

# Txirritola

ARAMAIO / Barikua / 2002ko maiatzaren 10a / 26. zenbakia

KOORDINATZAILEA: Ubane Madera • Otolara Lizentziaduna 31 20500 ARRASATE • Tel.: 943 71 25 11 • Faxa: 943 71 23 89 • Posta elektronikoa: txirritola@goiena.com

## Oletako saneamendu lanak uda aurretik bukatuta egotea espero dute

UBANE MADERA

Oleta auzoan egiten ari diren saneamendua berritzeko eta gasa sartzeko lanak uda baino lehen bukatuta egongo direla espero du Construcciones Olabarria enpresak. Eta lan horiek egin eta gero, Oletako bide nagusia zabaltzeko lanak egiten hasiko dira.

Iaz, urrian, hasi ziren Oletako lanak egiten. Saneamendu sarea berritzen eta gasa sartzen, hain zuzen ere. Eta lanak dezente aurreratuta doaz dagoeneko. Sergio Fernández-ek, lanotako arduradunetako batek, adierazi digunez, uda baino lehen bukatzea espero dute. Oro har, Oletako baserrietako ur zikinak batzeko kolektoreak eta ur horiek garbitzeko araztegiak ipintzen ari dira, urak garbitzeko bost sistema, hain justu ere. Eta gura duten baserrietaraino gasa helarazteko azpiegiturak ere ipintzen ari dira.

Horrez gain, eta lan horiek aprobeztatzuz, etorkizunean sor daitezkeen beharrei aurre egiteko, hodiak ere sartzen ari dira (zuntz optikorako...). Lan horiek egiteko zehaztu duten aurrekon-



UBANE MADERA

Oleta erreka albo bietan dauden baserrien ur zikinak batzeko kolektoreak ipintzen ari dira, besteak beste.

tua 640 mila euro pasatxokoa da.

### BIDEA ZABALTZEKO LANAK

Behin lan horiek bukatuta, Oletako bide nagusia zabaltzeko

lanak egiten hasiko direla adierazi digu Sergio Fernández-ek. Hain zuzen ere, orain, Arabako Foru Aldundia bidea zabaltzeko proiektua aztertzen ari da, diru-

laguntzak emateko. Errepidea zabaltzearekin batera, zenbait baserritara heltzeko bideak ere zolatuko dituzte. Ia 4.000 euroko aurrekontua zehaztu dute.

*Oleta auzoan batutako ur zikinak garbitzeko bost sistema ipiniko dituzte*

*Etorkizunean sor daitezkeen beharrei (telekomunikazioak) aurre egiteko hodiak ere sartzen ari dira*

*Lanen lehenengo zatia bukatutakoan, auzoko errepide nagusia zabaltzen hasiko dira*

## ATREBENTZIAEZPADA/ Zer igartzen duzu faltan Aramaion?



**MIKEL SERRATO**  
Ikaslea

Igerilekua falta zaigu, kanpokoa eta barrukoa; horrela, negurako eta udarako izango genuke. Nik pilotaleku ondoan egingo nuke igerilekua.



**MIKEL MENDIKUTE**  
Ikaslea

Igerilekua gura dugu, bai eta 'U' itxurako plataforma ere, patinetarekin ibiltzeko; ping-pong gunearen ondoan ipin daiteke plataforma hori.



**ARANE ALTUNA**  
Ikaslea

Ikastolan seigarren maila arteko ikasketak izan beharrean, hortik aurrerakoak ere izatea. Igerilekua eta 'U' itxurako plataforma ere behar ditugu.



**AMAIA KORTABARRIA**  
Ikaslea

Aramaiok futbol zelaia edukitzea gurako nukerik, partiduak ikustera joateko, herriko taldeak animatzera joateko, jolas-teko, eta abar.



**JONE URZURIAGA**  
Ikaslea

Parkea hobeto ipintzea gurako nukerik; kulunka gutxi ditu eta daudenak nahiko kaskar daude, gauza batzuk apurtuta daude...

## LABUR

### Uztaileko udalekuetan parte hartzeko

Uztaileko udalekuetan parte hartzeko izena emateko epea datorren maiatzaren 17an, egubakoitzean, bukatuko da. Interesa duten umeek eta begiraleek Udalean edo kultura etxean eman beharko dute izena. Begirale izateko betebeharrak bakarrik izango da 17 urte baino gehiago izatea. Edozelaian ere, beste baldintza batzuk ere baloratuko dituzte. Udalekuak uztailearen 10ean hasi eta 24ra artekoak izango dira, 10:00etatik 13:00etara. Auzokoek autobusa izango dute.



**TELEFONO JAKINGARRIAK**

**OSASUNA / LARRIALDIAK**

Osasun etxea (txandak)	945 44 53 40
Botika	945 44 50 03
Udaletxea	945 44 50 16
Ertzaintza (Arrasate)	943 79 71 99
Gurutze Gorria (Legutio)	945 45 52 52
San Martin Eskola	945 44 50 04
Taxia eta autobusak	945 44 50 33
Udal Kirolegia	945 44 53 35
Postetxea	945 44 50 83
Zulako Eskualdea	945 43 01 67
Suhiltzaileak (Zubillaga)	943 78 28 00

**AUTOBUSORDUTEGIA**

ARRASATE	ARAMAIO	GASTEIZ
07:00	07:15	08:00
12:00	12:15	13:00
15:20	15:35	16:20
20:30	20:45	

  

GASTEIZ	ARAMAIO	ARRASATE
08:30	09:15	09:30
13:10	13:50	14:05
	17:00	17:15
19:30	20:15	20:30

**OHARRAK**

**ARETO FUTBOLA**

Bukatzeaz dago Aramaioko neska-mutikoendako Areto Futbol Txapelketa. Kadete mailako mutilei pare bat partidu besterik ez zaie gelditzen; eta neskek kanporaketetan buru-belarri ari dira. Kanporaketak gaindituz gero, aurrera segituko dute; baina ez dute batere bide samurra, aurrez aurre izan behar dituzten talde biak mutikoez osatutakoak dira-eta. Edozelan ere, zapatuan bi partidu jokatu dira Aramaion: Mutikoez El Campillo taldearen kontra jokatuko dute, 10:30ean; eta neskek, berriz, ordubete geroago izango dute hitzordua, Langraitzeko Menesianos taldearen kontra.

**ZINEMA**

Oraingo domekan, aurten oso arrakasta handia lortu duen *Harry Potter* filma emango dute kultura etxean, 17:00etatik aurrera.

**HERRI URRATS**

Domekan, Herri Urrats ospatuko dute Senperen, eta Aramaiotik autobusa irtengo da Senperera joateko. Sei euro balio du. 09:00etan irtengo da parkeetik eta 19:00etan itzuliko da Senperetik.

**SENDABELARREN IKASTAROA**

Maiatzaren 15ean, eguaztean, bukatuko da Sendabelarren ikastaroan parte hartzeko izena emateko epea. Interesa duenak udaletxera jo beharko du. Ikastaroa maiatzaren 18an hasiko da eta uztailearen 20an bukatu. Guztira, bost jardunaldi izango dira, zapatuetan, 09:00etatik 13:00etara.

**GIZARTEA**

**Zuberoan sei ehun lanpostu sortzen laguntzeko, auzolana abiatu du Udalbiltzak**

Zuberoaren egoera larria dela-eta, Udalbiltzak kanpaina berezi bati ekin dio: Zuberoarendako milioi bat euro eskuratzea, gero, han, 600 lanpostu sortzen laguntzeko. Horretarako, Euskal Herriko zenbait herritan laguntza-taldeak eratu dituzte. Baita Aramaion ere, orain dela bizpahiru aste. Taldearen helburu nagusiak bi dira: Zuberoaren egoeraren berri ematea eta Aramaiori dagokion diru kopurua batzea: 1.500 euro. Horretarako, laguntza-txartelak saltzen hasi da Aramaioko taldea. Era berean, eta herriko jaiei begira, Zuberoako produktuen saltzaile batzuk Aramaiora ekartzeko asmoa ere badute, baita hango bertsolari edo abeslariren bat ere. Bestalde, Aramaioko Euskadiko Kutxan kontu korrante bat zabaldu dute laguntza eman gura dutenendako. Orain arte, 400-500 euro batu dituzte; hortaz, oraindik, jendearen laguntza handia behar da.

**ZUBEROTARREKIN BAT AUZOLANEAN**  
Helburua: 1.000.000 €

*Xiberoa garatzen!* egitasmoa

Biba Xiberon!

**BOTEPRONTOAN/ Kontxi Kortabarria · Altzaga auzoko bizilaguna eta alkate ohia**

*“Etxe gehiago eginez gero, jende gaztea etorriko da eta auzoari beste bizitza mota bat emango dio”*

**H**erriko auzoen gainbegiratuarekin bukatzeko Altzaga besterik ez zaigu falta, eta haraxe jo dugu oraingoan. Kontxi Kortabarriarekin berba egin dugu auzoaren berri jakiteko. Auzoko alkate izandakoa da Kontxi, eta auzoari izena ematen dion baserrian bizi da, *Altzaga Gainekoa*-n:

**Berriro ere izango zinateke auzo-alkate?**

Auzokideek baietz esanez gero, bai, bestela, ez. (Barreak) **Azkoagaren barruan egon arren, elizatek bananduta dago Altzaga auzoa; hortaz, nondik nora iristen da Altzaga auzoa bera?** Goitik hasita *Sarri* baserriarekin hasten da, Altzaga auzoa bera hartzen du, eta behean *Goiko Induspe* eta *Beheko Induspe* hartzen ditu. Auzo zabala da.

**Zenbat etxe/baserri daude?**

Bederatzi baserri daude eta beste bat edo bi egiten ari dira; hori oso ondo dago, horrela jende gehiago egongo garelako auzoan. Apurtxo bat aparte gaude, baina ondo.

**Hortaz, gustura hartuko duzue jendea?**

Bai. Orain dela hiru bat urte egin zuten etxe bat eta orain



beste bat edo bi egingo dituzte. Horrela, jende gaztea etorriko da eta auzoari beste bizitza mota bat emango dio. Adibidez, nire adineko jenderik ia ez da egon, ondorioz, beti aparte ibili gara: Arrasatera ikastolara, auzoan ez lagunik eta ez ezer...

**Zelan konpontzen zarete Azkoagako auzokideekin?**

Ondo konpontzen gara. Azkoagara joaten gara altzagarrok. Ez dugu askotan elkar ikusten, bereziki jende gazteak, bakoitzak bere bizimodu egiten duelako; baina gurasoek-eta badute harremana.

**Elkartea, eliza...**

Horretarako ere Azkoagara jotzen dugu.

**Auzoan baduzue pertsona/leku ezagunik edo antzinakorik?**

Martin, Altzagako Martin hemengoa da. Eta bestalde, geure baserri hau ere oso

antzinakoa da, 500-600 bat urte izango dituela uste dut.

**Zer eskatuko zenioke Udalarari auzoarendako?**

Saneamenduok-eta eginda daude, gasa ere badugu... Hori oso gauza inportantea izan da. Nik interes handia nuen hori egiteko, eta egin zen. Bestalde, postariarena ere konpondu dugu. Lehen, astean behin etortzen zen, baina orain, ia egunero etortzen da, hortaz...

Aspaldi eskatu nuen gauza bat da auzoan tximistorratza ipintzea, baina uste dut Udala ibiliko dela zerbaitean...

**Kanpotik datorren bati auzoko zer erakutsiko zenioke?**

Ingurutik buelta bat ematera eramango nuke lehenengo, gero San Adriango ermita ikustera ere joango ginatke eta etxe bakoitzeko zerbait erakutsiko nioke. Geure etxeak, adibidez, arku handia du eta jendea hori ikustera etortzen da...

**Eta zelan bizi zarete Altzagan?**

Ondo. Gaur egun, norberak bere automobila dauka, hortaz... Era berean, orain komunikazio gehitsuago dago; Udalak autobusekin lotutako hitzarmenen bat lortu du eta orain komunikazio hobea dugu; baina lehen nahiko bakarrik geunden.

**HERRIKO AUZOETAN**

**AZKOAGA I**

Etimologoez esanahi posible batzuk eman dizkiote Azkoagari: haitzen lekua, azkonarren lekua, ezki gunea... *Azkoaga* baserria berritzeko lanak egin zituztenez, ikusi zuten haitzen gainean zegoela eraikita, eta litekeena da hortik etortzea izena. Baserri horren eta beste batzuen gainean Elizako Liburuen baino lehenagoko datuak ditugu (1551. urtea). Ordurako, auzoko baserri gehienak eraikita zeuden; horrek esan gura du baserrietako asko lehenagokoak direla. Honako datuak ditugu:

— *Uriburu* edo *Urugu*, XVI. mendé bukaeran eraiki zuten; *Etxebarria-Elorriaga* baserriak bigarren etxe moduan eraikitakoa;

— *Salturrialde* edo *Salturralde*; Salturriak eraiki zuen bigarren etxebizitza moduan, *Uriburu*-koaren garaian;

— *Zaldua* edo *Zabaldu*, XVII. mendearen hasierakoa;

— *Azkoaga-txiki* edo *Dukiena*; Azkoagako bigarren etxebizitza moduan eraiki zuten. 1754. urtean existitzen zen dagoeneko.

‘Aramaioko Ibarren iragana eta oraina’. J.M. Elejalde Plazaola

*“Ondo konpontzen gara Azkoagakoekin; hara jotzen dugu, baita elizara eta elkartera ere”*

*“Zera eskatu nuen aspaldi: Altzaga auzoan tximistorratza ipintzea”*